

## **Arfernik angisuunik illersuineq piniarnerlu pillugit Namminersorlutik Oqartussat nalunaarutaat nr. 12, 22. december 2014-imeersoq**

Piniarnek aallaaniarnerlu pillugit Inatsisartut inatsisaat nr. 12-imi, 29. oktober 1999-imeersumi § 2, imm. 4, § 8, §§ 12-13, § 15 aamma §§ 17 aamma 18 naapertorlugit Inatsisartut inatsisaatigut nr. 1, 16. maj 2008-meersukkut kingullermik allanngortinneqartumi aalajangersarneqarpoq:

### **Kapitali 1**

#### *Atuuffia*

§ 1. Nalunaarummi matumani "arferit angisuut" tassaapput tikaagulliit (*Balaenoptera acutorostrata*), tikaagulliusaat (*Balaenoptera physalus*), arfiviit (*Balaena mysticetus*), qipoqqaat (*Megaptera novaeangliae*) arferillu soqqallit allat tikaagullinnit kigutilissuarnillu (*Physeter macrocephalus*) anginerusut.

### **Kapitali 2**

#### *Eqqissisimatitsineq*

§ 2. Arferit angisuut Kalaallit Nunaata aalisarnikkut oqartussaaffigisaata iluani eqqissisimatitaapput.

*Imm. 2.* Imm. 1-imi eqqissisimatitsinermi tikaagulliit, tikaagulliusaat, arfiviit aamma qipoqqaat ilaatinneqanngillat.

### **Kapitali 3**

#### *Piniagassanut pisassiissutinik aalajangersaaneq,*

§ 3. Ukiumoortumik arfernik angisuunik pisassiissutinik aalajangersaaneq makkua eqqarsaatigalugit pissaaq:

- 1) Nunani tamalaani isumaqatigiissutit atsiorneqarsimasut pisuussutit piujuartinnissaat amerliartornissaallu siunertaralugu,
- 2) uumassusilerinikkut siunnersuineq,
- 3) atuisut ilisimasaat aamma,
- 4) Piniarnek pillugu Siunnersuisoqatigiinnut tusarniaaneq.

*Imm. 2.* Pisassiissutinik taakkunungalugu piumasaqaatinik aalajangersaaneq pillugu nalunaaruteqarneq tamanut saqqummiunneqartarput [www.naalakkersuisut.gl](http://www.naalakkersuisut.gl)-imi aamma tusagassiorfinnut nalunaarutigalugu.

### **Kapitali 4**

*Piniarsinnaanermut akuersissutit, akuersissuteqarnerit aamma nakkutilliineq  
Piniarsinnaanermut akuersissutinik allagartanillu agguaassisarneq*

§ 4. Kommunalbestyrelsi Naalackersuisut pisassatut aalajangersimasaasa iluanni nalinginnaasumik akuersissuteqassaaq, piginnittumut angallat aqqatigut taasaq erseqqinnerusumilluunniit suussusiligaq atorlugu, § 14 naapertorlugu tikaagulliusaanik pisaqarsinnaanermut.

*Imm. 2.* Kommunalbestyrelsi Naalackersuisunit pisassiissutitut aalajangiussat iluini piniarsinnaanermut akuersissummik normulersukkanik tunniussisarpoq, tassuuna piginnittoq piniarsinnaanermut normunut tamanut angallammik aqqatigut taasaq erseqqinnerusumilluunniit suussusiligaq atorlugu § 10 naapertorlugu tikaagullimmik ataatsimik, § 17 naapertorlugu arfivimmik ataatsimik aamma § 20 naapertorlugu qipoqqarmik ataatsimik pisaqarsinnaasunngorlugu.

*Imm. 3.* Tikaagullimmik, arfivimmik aamma qipoqqarmik piniarnissamut akuersissutit tunniunneqartarput kommunalbestyrelsimut qinnuteqartoqareemerata kingorna nunaqarfinni siulersuisut aamma najukkami aalisartunut piniartunullu peqatigiiffik tusarniaavigereerlugit. Piniarsinnaanermut akuersissutit agguaanneqassapput allattuiffissat normulersukkat Piniarnermut Naalackersuisoqarfiup kommunalbestyrelsimut nassiussugai atorlugit.

*Imm. 4.* Kommunimi akuersissutit allagartallu agguaanneqartut qinnuteqaatinit tiguneqarsimasunit ikinnerussagaluarpata arfernik angisuunik piniarnissamut agguaassisoqassaaq tulleriaarilluni, ukiumi siuliani pisarineqarsimasut kiisalu piniarsinnaanermut akuersissutit atorneqanngitsut eqqarsaatigalugit.

§ 5. Arfeqatigiinnut sisamaasunut tamanut tamakkiisumik pisassiissutit piffissap piniarfiusussap aallartinginnerani ataatsikkoortumik agguaanneqartarput.

*Imm. 2.* Kommunalbestyrelsi tikaagulliusaarniarnissamut akuersissuteqarsinnaavoq inunnut, atuuttumik inuussutissarsiutigalugu piniarnermut allagartalinnut, aamma akuerisaasumik qaartartortalinnik tuukkartalimmik qamutililimmik angallatilimmut. Angallammik piginnittoq nammineq imaluunniit angallammi inuttaq arfernut qaartartortalimmik tuukkartalimmik atuisinnaanermut pikkorissarsimanermut atuuttumik uppersaateqassaaq. Akuersissutit tassaavoq allagaq kommunalbestyrelsip qinnuteqartumut tikaagulliusaarniarnissamut piumasqaatinik naammassinnissimasumut tunniussaa.

*Imm. 3.* Kommunalbestyrelsi arfivinniarnissamut aamma qipoqqarniarnissamut akuersissuteqarsinnaavoq inunnut atuuttumik inuussutissarsiutigalugu piniarnermut allagartalinnut, akuerisaasumik qaartartortalimmik tuukkartalimmik qamutililimmik angallatilinnut, piginnittoq nammineerluni imaluunniit inuttaasoq arfanniarnermut qaartartumik tuukkartalimmik qamutilimmut atuinissamut pikkorissarnermut peqataasimanermut atuuttumik uppersaateqassaaq.

*Imm. 4.* Kommunalbestyrelsi tikaagullinniarnissamut akuersissuteqarsinnaavoq inunnut atuuttumik inuussutissarsiutigalugu piniarnermut allagartalinnut, aammaluunniit:

1) akuerisaasumik qaartartortalimmik tuukkartalimmik qamutililimmik angallatilinnut, aammalu piginnittoq nammineerluni imaluunniit inuttaasoq arfanniarnermut qaartartumik tuukkartalimmik qamutilimmik atuinissamut pikkorissartitsinermut peqataasimanermut atuuttumik uppersaateqassaaq, imaluunniit

2) § 12 naapertorlugu ataatsimoorluni piniarnissamut immikkut akuersissuteqartumut.

*Imm. 5.* Kinaluunniit angallammut tuukkartalimmik qamutililimmut imaluunniit ataatsimoorluni piniarnissamut ataatsikkut akuersissummik tunineqarsinnaanngilaq.

*Imm. 6.* Ataatsimoorluni piniartoqassatillugu piniarnermut naalakkatut toqqarneqartumut akuersissuteqartoqassaaq. Ataatsimoorluni piniarnermut peqataasussat allat aqqi piniarsinnaanermut akuersissutip tunuani allanneqassapput.

*Imm. 7.* Piniarsinnaanermut akuersissutit akuersissuteqarnerillu qaammatisiutit ukiuat malillugu ukiumut ataatsimut atuupput, taamaattorli takuuk § 7, imm. 4.

§ 6. Kommunalbestyrelsi tikaagullinniarnissami, arfivinniarnissami aamma qipoqqarniarnissami pisassiissutinut naapertuuttunik piniarsinnaanermut akuersissuteqareeripat kommunalbestyrelsip Piniarnermut Naalackersuisoqarfimmut nassiutissavai akuersissuteqarfigineqartut aqqi, inuttut normui, akuersissutit normui aamma GR-normut pillugit paasissutissat kingusinnerpaamik kommunip akuersissutinut immersuiffik Naalackersuisoqarfimmiit tigusaqarnerata kingornatigut qaammat ataaseq qaangiutsinnagu.

*Imm. 2.* Tikaagullimmik, arfivimmik aamma qipoqqarmik piniarsinnaanermut akuersissut Kalaallit Nunaata Kitaani aamma Tunumi tikaagullimmut atorneqariissaaq arfeq pizarineqarpat pissanneqarpalluunniit.

*Imm. 3.* Akuersissut ukiakkut pisassiissutinik sinneruttunik agguasseqqittoqartinnagu atorneqarsimanngitsoq pisassiissutinut agguateqqitassanut ingerlaannartumik ilanngunneqassaaq, tamatumalu kingornatigut akuersissummik piginnittuusimasumit atorneqarsinnaassanani.

*Imm. 4.* Piniarnermut Naalackersuisup ukiumi tulliuuttumi kommunimi pisassiissutit ikilissinnaavai paasineqassagaluarpat kommunimi:

1) tikaagulliusaartoqarsimasoq pissaasoqarsimalluniluunniit akuersissuteqartoqarani,

2) akuersissuteqarani tikaagullittoqarsimappat, arfivittoqarsimappat qipoqqartoqarsimappalluunniit pissaasoqarsimalluniluunniit imaluunniit

3) qaammatisiutit ukiuat malillugit ukiumut akuersissutigineqartunit amerlanerusunik tikaagullittoqarsimappat, tikaagulliusaartoqarsimappat, arfivittoqarsimappat imaluunniit qipoqqartoqarsimappat pissaasoqarsimalluniluunniit. Pisassiissutit ikilineqarsinnaapput tikaagullinnut, tikaagulliusaanut, arfivinnut qipoqqarnulluunniit apeqqaatinnagu sorlernut unioqqutitsisoqarsimanersoq.

*Imm. 5.* Arfernik eqqissimatitaasunik pisaqarneq pissannerluunniit ukiumi pineqartumi ukiumiluunniit tulliuuttumi kommunimi inatsisunik unioqqutitsiviusumi pisassiissutit ikilisinneqarnerannik kinguneqarsinnaavoq. Tikaagullinnut, tikaagulliusaanut, arfivinnut qipoqqarnulluunniit pisassiissutinik ikilissisoqarsinnaavoq.

### *Piniarsinnaanermut akuersissutinik agguasseqqinneq*

§ 7. Piniarnermut Naalackersuisoq najukkami aalisartut piniartullu peqatigiiffiat tusarniaavigereerlugu aalajangiisinnaavoq piniarsinnaanermut akuersissut tunniunneqarsimasoq imaluunniit akuersissutit tunniunneqarsimasut kommunip iluani nuunneqassasut imaluunniit atorunnaassasut tamanna pillugu tamanut saqqummiussilluni [www.naalackersuisut.gl](http://www.naalackersuisut.gl) atorlugu tusagassiorfinnullu nalunaaruteqartoqarsimappat.

*Imm. 2.* Nalunaaruteqartoqareerpat piniarsinnaanermut akuersissummik piginnittup imaluunniit akuersissutinik piginnittut piniarsinnaanermut akuersissut imaluunniit akuersissutit kommunalbestyrelsimut tunniutissavaat.

*Imm. 3.* Piniarnermut Naalackersuisup kommunalbestyrelsi piumaffigisinnaavaa imm. 1 naapertorlugu piniarsinnaanermut akuersissutit tunniunneqareersimasut atorunnaarseqqullugit, tassa akuersissuteqartumit akuersissuteqartunilluunniit piffissaq eqqorlugu arfernik pisanik pissatanillu nalunaarutiginnitarneq pillugu nalunaarummi maleruagassat malillugit arferit pisat pissatallu pillugit Piniarnermut Naalackersuisumut nalunaaruteqarsimangippata.

*Imm. 4.* Piniarnermut Naalackersuisoq Kalaallit Nunaanni Aalisartut Piniartullu Kattuffiat (KNAPK) aamma Kommunit Kattuffiat (KANUKOKA) siumut tusarniaareerluni [www.naalackersuisut.gl](http://www.naalackersuisut.gl) aamma tusagassiorfitsigut nalunaaruteqarnikkut, akuersissutit atortussannagortinneqarsimasut kommunep iluani, kommunimut allamut nuunneqartut imaluunniit atorunnaarsinneqartut piffissaq nalunaaruteqarfusoq aallartiffigalugu. Tamatuma kingorna akuersissutit utertinneqassapput, takuuk imm. 2.

### *Pisassiissutinik agguasseqqinneq*

§ 8. Piniarnermut Naalackersuisup KNAPK aamma KANUKOKA tusarniaavigereerlugit tikaagullinnut, tikaagulliusaanut, arfivinnut aamma qipoqqarnut pisassiissutit sinnerisinnaasaat agguateqqissavai. Ukiuni qaammatisiuteqarfiusuni tamani kingusinnerpaamik 1. september tikaagullittassanik, tikaagulliusaartassanik, arfivittassanik aamma qipoqqartassanik agguasseqqinnissaq aallartinneqarsimassaaq. Arfanniarneq inerteqqutaavoq agguasseqqinnissaq ullormik ataatsimik sioqqullugu aatsaallu aallarteqqinneqarsinnaalluni kommuni najukkami aalisartut piniartullu peqatigiiffiat tusarniaavigereerlugu nutaamik agguasseqqereerpat tamanullu nalunaaruteqareerpat.

*Imm. 2.* Agguasseqqinneq tamatumunngalu piumasaqaatit pillugit nalunaaruteqarneq tamanut saqqummiunneqassaaq [www.naalackersuisut.gl](http://www.naalackersuisut.gl) aqqutigalugu tusagassiorfinnullu nalunaaruteqarnikkut.

*Imm. 3.* Nalunaaruteqartoqareerpat piniarsinnaanermut akuersissummik piginnittup imaluunniit akuersissutinik piginnittut akuersissut imaluunniit akuersissutit kommunalbestyrelsimut tunniutissavaat.

*Imm. 4.* Piffissami 15. augustimiit agguasseqqinnissap tungaanut tikaagullinniarnissaq, tikaagulliusaarniarnissaq, arfivinniarnissaq aamma qipoqqarniarnissaq eqqarsaatigalugit,

kommunalbestyrelsit ataasiakkaat akunnerminni namminneq pisassiissutinik sinneruttunik agguaasseqqissinnaapput. Kommunini pineqartuni agguaasseqqittoqassaaq najukkani aalisartut piniartullu peqatigiiffii tusarniaavigereerlugit.

*Imm. 5.* Nunap immikkoortortaani inuussutissarsiornermut allaffiit aqutsiveqarfinni Tasiilami aamma Ittoqqortoormiini Kommuneqarfik Sermersuumiittumi KNAPP-t suleqatigalugit akunnerminni Tunumi pisassiissutinik agguaasseqqinnissaq oqaloqatigiissutigisinnaavaat 1. augustip kinguninnguutigut.

*Imm. 6.* Imm. 3 aamma 4 naapertorlugit agguaasseqqinneq pillugu aalajangiussat allaganngorlugit Piniarnermut Naalakkersuisoqarfimmut nalunaarutigineqassapput agguaasseqqittoqannginnerani kingusinnerpaamik sapaatip akunneranik sioqqullugu. Taamatuttaaq pisassiissutit sinnerinik agguaasseqqinnermi angusat Piniarnermut Naalakkersuisoqarfimmut nalunaarutigineqassapput.

*Imm. 7.* Piniarnermut Naalakkersuisup KNAPK aamma KANUKOKA siumungaaq tusarniaavigereerlugit [www.naalakkersuisut.gl](http://www.naalakkersuisut.gl) aqutugalugu aamma tusagassiorfinnut nalunaaruteqarnikkut tamanut saqqummiussilluni nalunaarutigisinnaavaa, akuersissutit tunniunneqarsimasut kommunimut allamut imaluunniit kommunip iluani nuunneqarsimasut imaluunniit atorunnaarsimasut nalunaaruteqarnerup saqqummiunneqarnerani piffissamiit atuutilersumik. Tamatuma kingorna akuersissutit utertinneqassapput imm. 3 naapertorlugu.

## **Kapitali 5**

### *Arfernik piniarneq*

#### *Tikaagulliit*

§ 9. Piniarnermut Naalakkersuisup ukiut tamaasa KNAPK aamma KANUKOKA tusarniaavigereerlugit nalunaarutigissavaa, tikaagulliit amerlanerpaamik qassit qaammatsiutit ukiuanni Kalaallit Nunaata Kitaani aamma Tunumi pisarineqarsinnaanersut.

§ 10. Tikaagulliit taamaallaat piffissami 1. marts - 30. novembarimut pisarineqarsinnaapput, ullut taaneqartut marluk ilanngullugit.

*Imm. 2.* Tikaagulliit piaqqisartillugit arnavissat piaraalluunniit pisarineqaqqusaanngillat.

*Imm. 3.* Taamaallaat inuit arfanniarsinnaanermut akuersissutillit akuerisaasunillu atortullit tikaagullissinnaapput, takukkit §§ 4, 11 aamma 22. Atortut Piniarnermut Naalakkersuisoqarfimmit taamaasiornissamut ingerlatseqatigiiffimmit akuerisaasumit akuersissutigineqarsimassapput.

#### *Tikaagullinniarnermi atortut*

§ 11. Angallatit qaartartortalimmik tuukkartalimmik qamutilillit, tikaagullinniarnermut peqataasut, sutigut tamatigut 9,2 aamma 22,0 meterit akornanni angissuseqassapput ningittakkanut qalorsuarnulluunniit amooruteqassallutik minnerpaamik 2 tonsinik amoorisinnaassusilinnik imaluunniit angallatit qaqitsissuteqassapput.

*Imm. 2.* Angallatit imm. 1-imi taaneqartut Umiartornermik Aqutsisoqarfimmi GR-normulerlugit, radiukkut kalerrisaarinermi ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

*Imm. 3.* Tikaagullinniarnermut taamaallaat atorneqarsinnaapput qamutiliit qaartartortalimmik tuukkartallit 50 mm-inik kaliberillit tikaagullinniarnermi qaartartortalinnik tuukkallit §§ 22 aamma 23 naapertorlugit. Qaartartortalinnik tuukkartat arfanniutit Piniarnermut Naalackersuisumit akuerineqarsimasuussapput.

*Imm. 4.* Taamaallaat inuit qaartartortalimmik tuukkamik arfanniummik atuinissamut pikkorissartitsinernut peqataasimanerminnut atuuttumik uppernarsaatillit qaartartunik taaneqartunik pisisinnaapput atuisinnaallutillu.

*Imm. 5.* Qaartartortalinnik tuukkartanik arfanniutinik taamaallaat tunisisoqarsinnaavoq imm. 4 naapertorlugu atuuttumik uppernarsaammik ukiumut pineqartumut piniarsinnaanermut akuersissummik atuuttumik takutitsisoqarneratigut.

*Imm. 6.* Tikaagullik pissaneqartoq, toqunneqanngitsorli sapinngisamik piaarnerpaamik toqunneqassaaq. Niaquagut aallaallugu toqunneqassaaq, qaartartortalimmik tuukkamik arfanniummik imaluunniit qoorortuumik minnerpaamik 7,62x65 mm (.30-06)-imik sulloqqortussusilimmik.

*Imm. 7.* Piniarsinnaanermut akuersissutilik piffissaalluarallartillugu piniarnissamut pilersaarut aamma ulloq piniarfiusussaaq pillugit sumiiffimmi piniarnermut aalisarnermullu nakkutilliisumut siumoortumik nalunaarutigissavai.

#### *Ataatsimoorluni tikaagullinniarneq*

§ 12. Piniarnermut Naalackersuisoq akuersisinnaavoq ataatsimoorluni piniarnermi qamutilimmik tuukkartalimmik sakkoqanngikkaluarluni amerlanngitsunik tikaagullittoqarsinnaaneranut. Taamatut akuerinnittoqarsinnaavoq piniarneq nunaqqatigiinnut annertuumik pingaaruteqarpat aamma nunaqqatigiit angallatinit tuukkartalinnik qamutililinnit neqinik nutaanik naammattumik pilersorneqarsinnaanngippata.

*Imm. 2.* Piniarnermut Naalackersuisup ataatsimoorluni tikaagullinniarnissamut akuersissutigineqartut aqutsiveqarfinnut agguaatissavai KNAPK aamma KANUKOKA tusarniaavigereerlugit, nunamut tamarmut pisassat tamarmiusut agguaannerannut peqatigitillugu.

*Imm. 3.* Kommunip ataatsip aqutsiveqarfiullu ataatsip iluani ataatsimut piniaqatigiilluni piniarsinnaanermut akuersissutit agguaanneqarneranni nunaqarfiit tamatumalu tulliani illoqarfiit qaartartortalimmik tuukkartalimmik qamutililinnik angallateqanngitsut sallerpaatinneqassapput.

*Imm. 4.* Taamaallaat umiatsianik piginnittut ataatsimoorluni piniarnissamut akuersissummik tunineqarsinnaapput.

*Imm. 5.* Akuersissuteqarnissami piumasaaqatigineqarpoq:

1) piniarneq aqqissuunneqassasoq ataatsimoorluni piniarnertut ikinnerpaamik umiatsiaaqqat tallimat piniarnerni ataasiakkaani peqataatillugit,

- 2) angallatit qaartartortalimmik tuukkartalimmik qamutileqannngitsut sutigut tamatigut 9,2 meterit angullugit angissusillit ataatsimoorluni piniarnermi peqataasinnaapput, kisiannili angallatit siuttuutinneqassanak.
  - 3) piniarneq qoorortuut minnerpaamik 7,62x63 mm-imik (.30-06) sulloqqortussusillit atorlugit ingerlanneqassaaq,
  - 4) umiatsiaaqqat tamarmik unaaqassapput alertalinnik avataasaqassallutillu pisap kivisinnginnissaanut naammattunik.
  - 5) angallatit ataatsimoorluni piniarnermut peqataasut taamatuttaaq ningittakkanut qalorsuarnulluunniit amoortaateqassapput minnerpaamik 2 tonsinik kivitsisinnaasunik, kraftblokmilluunniit atortuligaassallutik.
  - 6) piniarneq ingerlanneqassasoq naalakkamit, agguaanermut atatillugu najukkami aalisartut piniartullu peqatigiiffiannit kommunimillu umiatsiaaqqanik piginnittut akornannit toqqarneqartumit piniarsinnaanermut akuersissummillu piginneqataasunit tamanit siumut ilisimaneqartumit aqunneqarluni,
  - 7) piniarneq aallartinneqassanngilaq ataatsimoorluni piniarnermut peqataasussat piniarsinnaanermik akuersissummillu piginneqataasut tamarmik piniarnerup aallartinnissaanik kalerrinneqareertinnagit.
  - 8) tikaagullik sapinngisamik pilertornerpaamik toqusarneqassaaq aamma
  - 9) piniarsinnaanermut akuersissummik pisaqarnermi peqataasut pisap agguarneqarnerani ilaatinneqassapput.
- Imm. 6.* Piniarsinnaanermut akuersissutillip piffissaalluarallartillugu piniarnissamut pilersaarut aamma ulloq piniarfiusussaq pillugit sumiiffimmi piniarnermut aalisarnermullu nakkutilliisumut siumoortumik nalunaarutigissavai.

### *Tikaagulliusaat*

§ 13. Ukiut tamaasa Piniarnermut Naalakkersuisup KNAPK aamma KANUKOKA tusarniareerlugit nalunaarutigisassavaa qaammatisiutit ukiuat malillugu ukiumi tassani Kalaallit Nunataa Kitaani tikaagulliusaat qassit pisarineqarsinnaanersut.

§ 14. Tikaagulliusaat 15,2 meterinit takinerusut kisimik piffissami 1. januaarimiit 31. decembarimut ullut marluk pineqartut ilanngullugit pisarineqarsinnaapput.

*Imm. 2.* Tikaagulliusaat piaqqisartillugit arnavissat piaqqalluunniit pisarineqaqquusaanngillat.

*Imm. 3.* Taamaallaat inuit tikaagulliusaarniarnissamut akuersissutillit akuerineqarsimasunillu atortullit tikaagulliusaarsinnaapput §§ 4, 15 aamma 22 naapertorlugit. Atortut ingerlatseqatigiiffimmit Piniarnermut Naalakkersuisumit taamaasiornissamut akuerineqarsimasumit akuersissutigineqarsimassapput.

### *Tikaagulliusaarniarnermi atortut*

§ 15. Angallatit tikaagulliusaarniarnissamut akuerisat makkuupput:

- 1) angallat ataaseq minnerpaamik 11,0 meter t.t.-imik takissusilik.
- 2) Tikaagulliusaamut ataatsimut ikinnerpaamik angallatit marluk tamarmik minnerpaamik 9,2 meterinik (t.t.) takissusillit.

*Imm. 2.* Angallatit imm. 1-imi taaneqartut Umiartornermik Aqutsisoqarfimmi GR-normulerlugit, radiukkut kalerrisaarinermi ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

*Imm. 3.* Angallatit imm. 1-imi taaneqartut qaartartortalinnik tuukkartalinnik qamutileqassapput aamma ningittakkanut qalorsuarnulluunniit amoorutininik minnerpaamik tonsinik tallimanik qaqtsisinnaassusilinnik amooruteqassapput imaluunniit kraftblokimik atortulissallutik. Angallatit tamarmik aleqassapput sioqutalimmik avataqassallutillu pisarineqartup kivinnginnissaanut naammattunik.

*Imm. 4.* Tikaagulliusaarniarnermi taamaallaat atorneqarsinnaapput qamutillit tuukkartallit minnerpaamik 50 mm-inik sulloqqortussillit tuukkallu nuuatigut tikaagulliusaamut atortakkamik qaartartortallit, takukkit §§ 22 aamma 23. Tuukkat qaartartortallit arfanniutit Piniarnermut Naalackersuisumit akuersissutigineqarsimassapput.

*Imm. 5.* Tikaagulliusaarniarnerit tamaasa qaartartup tuukkap arfanniutip saniatigut allamik unaamik qaartartortalimmik tuukkartalimmik arfanniummik piareersimasoqassaaq.

*Imm. 6.* Taamaallaat inuit qaartartortalimmik tuukkamik arfanniummik atuinissamut pikkorissartitsinermut peqataasimanerminnut atuuttumik uppernarsaatillit taamaattunik pisisinnaapput atuisinnaallutillu.

*Imm. 7.* Qaartartunik tuukkartalinnik arfanniutinik taamaallaat tunisisoqarsinnaavoq imm. 6 naapertorlugu atuuttumik uppernarsaammik kiisalu ukiumut pineqartumut akuersissummik atuuttumik takutitsisoqarneratigut.

*Imm. 8.* Tikaagulliusaaq pissanneqartoq, toqunneqanngitsorli sapinngisamik piaartumik toqunneqassaaq. Toqutsisoqassaaq niaquatigut qaartartumik tuukkamik tikaagulliusaarniummik aallaallugu.

*Imm. 9.* Akuersissummik pigisalik piffissaalluarallartillugu piniarnissamut pilersaarut aamma ulloq piniarfiususaaq pillugu sumiiffimmi piniarnermut aalisarnermullu nakkutilliisumut siumoortumik nalunaaruteqassaaq.

### *Arfiviit*

§ 16. Ukiut tamaasa Piniarnermut Naalackersuisup KNAPK aamma KANUKOKA tusarniareerlugit nalunaarutigisassavai qaammatisiutit ukiuat malillugu ukiumi tassani Kalaallit Nunataa Kitaani arfiviit qassit pisarineqarsinnaanersut.

§ 17. Taamaallaat arfiviit inersimasut pisarineqarsinnaapput piffissami apriliip 1-ianiit decembarip 31-anut ullut pineqartut marluk ilanngullugit.

*Imm. 2.* Arfiviit piaqqisarpata arnaat piaraalluunniit pisarineqaqqusaanngillat.

*Imm. 3.* Taamaallaat inuit arfanniarnermut licensillit akuerisaasunillu atortoqartut arfivinniarsinnaapput, takukkit §§ 4, 18 aamma 22. Atortut Piniarnermut



Naalackersuisoqarfimmit taamaasiornissamut ingerlatseqatigiiffimmit akuerisaasumit akuerineqarsimasuussapput.

### *Arfivinniarnermi atortut*

§ 18. Angallatit arfivinniarnissamut akuerisat ukuupput:

Arfivimmuut ataatsimut angallatit ikinnerpaamik pingasut tamarmik takissuseq tamakkerlugu (t.t.) minnerpaamik 11,0 meterinik takissusillit.

*Imm. 2.* Angallatit imm. 1-imi taaneqartut Umiartornermik Aqutsisoqarfimmi GR-normulerlugit, radiukkut kalerrisaarineri ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

*Imm. 3.* Angallatit imm. 1-imi taaneqartut qamutilimmik qaartartortalinnik tuukkartalinnik aamma ningittakkanut qalorsuarnullunniit amoorutinik minnerpaamik tonsinik tallimanik qaqtisinnaasunillinik amooruteqassapput imaluunniit kraftblokumik atortuligaassallutik. Angallatit tamarmik aleqassapput sioqarlutik aamma avataqassallutik pisarineqartup kivinnginnissaanut naammattunik.

*Imm. 4.* Arfivinniarnermi taamaallaat atorineqarsinnaapput qamutillit tuukkartalinnik minnerpaamik 50 mm-inik sulloqqortussusillit tuukkallu nuuatigut ikkuttakkanik tikaagulliusaamut atortakkamik qaartartortalinnik, takukkiit §§ 22 aamma 23. Qaartartut Piniarnermut Naalackersuisumiit akuerineqarsimasussaapput.

*Imm. 5.* Arfivinniarnermi tamaasa angallatit arfivinniarnermi ilaasut tuukkamik qaartartortalinnik allamik arfanniummik piareersimatitsisoqassaaq.

*Imm. 6.* Taamaallaat inuit qaartartortalinnik tuukkamik arfanniummik atuinissamut pikkorissartitsinermut peqataasimanerminnut atuuttumik uppersaatillit qaartartunik taaneqartunik pisisinnaapput passussisinnaapput.

*Imm. 7.* Qaartartunik tuukkartalinnik arfanniutinik taamaallaat tunisisoqarsinnaavoq imm. 6 naapertorlugu atuuttumik uppersaammik kiisalu ukiumut pineqartumut licensimik atuuttumik takutitsisoqarneratigut.

*Imm. 8.* Arfivik pissanneqartoq, toqunneqanngitsorli sapinngisamik piaartumik toqunneqassaaq. Toqutsineq pissaaq sakiaatigut tuukkaq qaartartortalinnik arfivinniut atorlugu.

*Imm. 9.* Licensimik pigisaqartoq piffissaalluarallartillugu piniarnissamut pilersaarut aamma ulloq piniarfiusussaq pillugu piniarnermut aalisarnermullu nakkutilliisumut sumiiffimmi qaninnermut siumoortumik nalunaaruteqassaaq.

### *Qipoqqaat*

§ 19. Piniarnermut Naalackersuisoq, KNAPK aamma KANUKOKA tusarniaaffigereerlugit ukiut tamaasa nalunaarutigisarpai Kitaani qipoqqaat amerlanerpaamik qassit ukioq taanna pisarineqarsinnaanersut.

§ 20. Taamaallaat qipoqqaat inersimasut pisarineqarsinnaapput piffissami januaarip 1-ianiit decembarip 31-anut ullut pineqartut marluk ilanngullugit.

*Imm. 2.* Qipoqqaat piaqqisartillugit arnaat piaraalluunniit pisarineqaqqusaanngillat.

*Imm. 3.* Taamaallaat inuit arfanniarnissamut licensiuteqartut qipoqqarnisarnissamullu atortunik akuerisanik peqartut qipoqqarniarsinnaapput, takukkit §§ 4, 21 aamma 22. Atortut ingerlatsivinnit Piniarnermut Naalakkersuisumit taamaaliornissamut pisinnaatissimasaanit akuerineqarsimasussaapput.

### *Qipoqqarniarnermi atortut*

§ 21. Angallatit qipoqqarniarsinnaanermut akuerineqartut ukuupput:

1) Angallat ataaseq takissusaa minnerpaamik 11,0 meterimik (t.t.) takissusilik.

2) Qipoqqarmut ataatsimut angallatit ikinnerpaamik marluk takissusaat minnerpaamik 9,2 meterimik (t.t.) takissusillit.

*Imm. 2.* Angallatit imm. 1-imi taaneqartut Umiartornermik Aqutsisoqarfimmi GR-normulerlugit, radiukkut kalerrisaarinermi ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

*Imm. 3.* Angallatit imm. 1-imi taaneqartut qamutilimmik tuukkartalinnik aamma ningittakkanut qalorsuarnut amoorutinik minnerpaamik tonsinik tallimanik qaqitsisinnaassusilinnik amoortaateqassapput imaluunniit kraftblokimik atortulersugaassallutik. Angallatit tamarmik aleqassapput sioqutalimmik avataqassallutillu pisarineqartup kivinnginnissaanut naammattunik.

*Imm. 4.* Qipoqqarniarnermi taamaallaat atorneqarsinnaapput qamutillit qaartartortalinnik tuukkartalillit minnerpaamik 50 mm-inik sulloqqortussusillit tuukkallu nuuatigut ikkuttakkanik qipoqqarniarnermut atortakkanik qaartartortalit imaluunniit allat arfernut angisuunut akuerisat qaartartortalinnik tuukkartalit arfanniutinngorlugit allanngortitikkat, takukkit §§ 22 aamma 23. Qaartartortalinnik tuukkat arfanniutit Piniarnermut Naalakkersuisumiit akuerineqarsimassussaapput.

*Imm. 5.* Qipoqqarniarnemit tamaasa tuukkamik qaartartortalimmik allamik piareersimatitsisoqassaaq.

*Imm. 6.* Taamaallaat inuit qaartartumik tuukkap nuuanut ikkuttakkamik atuinissamut pikkorissartitsinermut peqataasimanerminnut atuuttumik uppersaatillit qaartartumik pineqartumik pisisinnaallutillu passussisinnaapput.

*Imm. 7.* Qaartartunik tuukkap nuuanut ikkuttakkanik taamaallaat tunisisoqarsinnaavoq imm. 6 naapertorlugu atuuttumik uppersaammik, kiisalu ukiumut pineqartumut licensimik atuuttumik takutitsisoqarneratigut.

*Imm. 8.* Qipoqqaq pissanneqartoq, toqunneqanngitsorlu sapinngisamik piartumik toqunneqassaaq. Toqutsineq pissaaq tuukkaq qaartartortalik atorlugu niaquata nalaatigut qipoqqarniummik qaartartulimmik tuukkarterlugu.

*Imm. 9.* Licensimik pigisaqartoq piffissaq naleqquttoq sioqqullugu sumiiffimmi piniarnermut aalisarnermullu nakkutilliisumut qaninnermut siumoortumik nalunaaruteqassaaq.

#### *Qamutillit tuukkartallit ataatsimut isigalugit*

§ 22. Qamutillit tikaagullinniarnermut, tikaagulliusaarniarnermut, arfivinniarnermut qipoqqarniarnermullu atorneqartut teknikkikkut atorsinnaassutsimikkullu akornuteqassanngillat, taamaalilluni inuit ajoquseriataamissaannut ulorianartorsiortitsissanatik. Taamatuttaaq piniarnermut atortut imatut siunertarineqartunut naleqqutsigissapput arfermik toqusaaneq sapinngisamik sukkanerpaamik pisinnaassalluni.

*Imm. 2.* Qamutilimmik qaartartortalimmik tuukkartalimmik angallammut ikkussineq tamatigut suliffeqarfimmit Piniarnermut Naalackersuisup taamaasiorsinnaanissamut piginnaatinneqarsimasumit akuerineqarsimassaaq.

§ 23. Qamutillit qaartartortalimmik tuukkartallit tamarmik ukioq allortarlugu ingerlatsivimmit Piniarnermut Naalackersuisumit taamaaliornissamut piginnaatinneqarsimasumit akuersissutigineqarsimassaaq.

#### *Akuerineqareerluni toqutsisariaqarneq*

§ 24. Arfermik angisuunik annertuunik ikilikkanik toqulersunik, ut tunillaassuuttumik nappaateqarunarlutik naammattoorneqarsimasunik, arfermik angisuunik aalisarnermi qassutinut aalisarnermiluunniit atortunut allanut nerngussimasunik, kiisalu arfermik angisuunik sassaasunik toqutsineq siumut Piniarnermut Naalackersuisoq toqutsisoqarsinnaavoq.

*Imm. 2.* Maleruaqqusanik unioqqutitsinani tikaagullimmik, tikaagulliusaamik, arfivimmik imaluunniit qipoqqarmik pisaqarnermi, pisaq inunnit nerissallugu piukkunnganngitsoq paasinarsissagalarpat, pisap nappaateqarneranik imaluunniit allamik pissuteqartumik, Piniarnermut Naalackersuisoq akuersissuteqarsinnaavoq, pisaq toqutsinertut isigineqarsinnaasoq. Pisaqarnermi licensi imaluunniit akuersissut atorneqarsimappat taanna suli atuutiinnassaaq.

*Imm. 3.* Imm. 1 aamma imm. 2 naapertorlugit toqunneqartariaqarsimasunik atuinissamut piunasaqaatit Piniarnermut Naalackersuisumit aalajangersarneqassapput.

### **Kapitali 6**

#### *Pilaffik pisallu atorluarneqarnissaat*

#### *Pilaffik*

§ 25. Kommunalbestyrelsi, sumiiffimmi aalisartut piniartullu peqatigiiffiat tusarniareerlugu pilattarfinnik akuerisaasunik toqqaanissamut akisussaasuvoq.

Imm. 2. Arfanniarnermi angallammi ittuusup arfermik pisaqarfimmiit pilaffissamut ungasissuseq qaninnerpaanissaa nakkutigissavaa, asiutitsisoornissaq taamaasillunilu annaasaqarnissaq pinaveersimatinniarlugu.

### *Pisamik atorluaanissaq*

§ 26. Kikkulluunniit arfermik angisuumik pisaqartut pisarineqartup nerineqarsinnaasortai tamaasa iluaqutigissallugit pisussaapput. Pisarineqartoq tamakkerlugu atorneqarsinnaanngippat tunineqarsinnaananiluunniit pisaqartoq pisussaavoq sinneruttut sumiiffimmi najugaqartunut tunniutissallugit.

Imm. 2. Arfermik pilanneq kiisalu arferup perlukuinik eqqaaneq inuussutissalerinermi nakkutilliinermik inatsisit aamma avatangiisit illersorneqarnissaannik inatsisit naapertorlugit ingerlanneqartassaaq. Arferup saanikuinik pinngortitami asiutinneqarnissai siunertaralugit inissiigallarnissaq pissaaq Piniarnermut Naalakkersuisoq aamma kommunini oqartussaasut sukumiinerusumik isumaqatigiissuteqarfigereerlugit.

## **Kapitali 7**

### *Pisanik nalunaarsuineq, tunitsivinnut tunisineq aamma tuniniaaneq Nalunaarsuineq*

§ 27. Tikaagullit, tikaagulliusaat, arfiviit qipoqqaalluunniit pisarineqartut tuniarneqalissanngillat kommunip allaffia taassumaluunniit immikkoortotaqarfia pisarineqartunik nalunaarsueqqaarsimatinnagu. Nalunaarsuisoqartassaaq akuersissummi allagartamiluunniit naqissusiinikkut.

Imm. 2. Akuersissummik imaluunniit qamutilimmik tuukkartalimmik qaartartortalimmik piniarnissamut akuersissummik piginnittoq naqitsimmik naqissusiisoqartinnagu pisussaavoq tuukkamik qaartartortalimmik arfanniummik pisiami allagartaa kommunip allaffianut takutissallugu kiisalu qaartartut atoriikkani takutissallugit normuisa misissorneqarnissaat siunertaralugu.

Imm. 3. Pisamik taassumaluunniit ilaanik tuniniaasoqaranilu pisisoqassanngilaq, akuersissummik allagartamilluunniit piginnittup akuersissutip allagartalluunniit nuutinneratigut uppersaareersimatinnagu, tuniniaaniarluni pisumi qinnuigineqarnikkut takutinneqartussamik. Nuutinneratigut takuneqarsinnaassaaq, pisarineqartoq kommunimi oqartussaasumit nalunaarsorneqarsimasoq.

Imm. 3. Taamaattoq kommunip allaffiata ammanerisa avataatigut tuniniaaneq aallartinneqarsinnaavoq allaffiup ammanerata kingornatigut piaartumik nalunaarsuisoqareerpat.

### *Tunisineq*

§ 28. Arferit angisuut nerineqarsinnaasortaanik angallatit tunitsivittut atorneqassanngillat.

*Imm. 2.* Tunitsivinnut akuerisaasunut pisarineqartunik tunisineq taamaallaat inuussutissarsiutigalugu piniartunit, piniarnermut allagartamik atuuttumik aamma akuersissummik allagartalimilluunniit naqissuserneqarsimasumik takutitsisinnaasumik pisinnaavoq § 27, imm. 1 aamma 3 naapertorlugu.

*Imm. 3.* Naalackersuisut kommuninut pisassiissutini pisassiissutinik tunisassanik aalajangersaasinnaapput, kommunini piniarsinnaanermut pisassiissutinik tunineqarsimasuni.

*Imm. 4.* Tunineqarsinnaasutut pisassiissutinik aalajangersaasoqarsimappat, tunitsiviit ullut tamaasa tunineqarsimasut annertussusii pillugit piffissami tunisinerup akuersissutigineqarfigisaani Piniarnermut Naalackersuisoqarfimmut paasissutissiisassapput.

*Imm. 5.* Piniarnermut Naalackersuisoq tamanut saqqummiussaqaarluni nalunaaruteqartassaaq [www.naalackersuisut.gl](http://www.naalackersuisut.gl) atorlugu tunisineq qaqugu taamaatinneqassanersoq kommunimi sumiiffimiluunniit aqutsiviusumi pineqartumi.

### *Tuniniaaneq*

§ 29. Atuisussavimmut, taakkununga ilanngullugit igaffissuaqarfinnut, neriniartarfinnut, sullissiveqarfinnut assigisaannulluunniit, kiisalu najukkani kalaalimineerniarfinniit tuniniaanerit aamma inuinnarnut tunisaqartarnerit taamaallaat inuussutissarsiutigalugu piniartunit inuussutissarsiutigalugu piniarnermut allagartamik atuuttumik pigisaqartumit ingerlanneqarsinnaavoq aamma akuersissummi allagartamilluunniit § 27 imm. 1 aamma 3 naapertorlugit naqissuserneqarsimasunik takutitsisinnaasumit, imaluunniit taamaasiorsinnaanissamut inunnit piginnaatinneqarsimasunik qinnuigineqarnerminni uppersaatinik takutitsisinnaasunik.

*Imm. 2.* Suliffeqarfinnut toqqaannartumik tuniniaaneq taamaallaat inuussutissarsiutigalugu piniartunit inuussutissarsiutigalugu piniarnermut allagartamik atuuttumik peqartumit ingerlanneqarsinnaavoq aamma akuersissummik allagartamilluunniit § 27 imm. 1 aamma 3 naapertorlugit naqissuserneqarsimasunik takutitsisinnaasumit, imaluunniit taamaasiorsinnaanissamut inunnit piginnaatinneqarsimasunik qinnuigineqarnerminni uppersaatinik takutitsisinnaasunik.

*Imm. 3.* Igaffissuaqarfiit, neriniartarfiit, sullissiveqarfiit assigisaallu imm. 1-imi taaneqartut, kiisalu suliffeqarfiit imm. 2-mi taaneqartut uppersarsinnaassavaat neqit, orsut, qipoqqat mattaallu arfernit angisuuneersut inuussutissarsiutigalugu piniartunit inuussutissarsiutigalugu piniarnermut atuuttumik naqissuserneqarsimasunik allagartalinnit akuersissutilinniilluunniit pisisimanertik uppersarsinnaassavaat, § 27, imm. 1 aamma 3 naapertorlugit.

*Imm. 4.* Imm. 1-imiit 3-mut naapertorlugit uppersaataat, atsiorneqarsimasoq akiliisimanermut uppersaataasoq inuussutissarsiutigalugu piniarnermut allagartamik atuuttumik nuutinneqarsimasumik naqissuserneqarsimasumik akuersissutitalik allagartartalilluunniit.

§ 30. Inuussutissarsiutigalugu piniarnermut allagartaq atuuttoq, akuersissut, allagartaq tunisinissamut akuerineqarsimaneq qaqugukkulluunniit politiinit, piniarnermut

aalisarnermullu nakkutilliisunit aamma inunnit taamaasiorsinnaanissamut piginnaatinneqarsimasunit qinnuigineqarnermi takutinneqarsinnaassaaq.

### **Kapitali 8**

#### *Umassusilerinikkut misissugassat assilisallu*

§ 31. Kinaluunniit arfermik angisuumik pisaqarsimasoq pisussaavoq neqiminermik mattattalimmik kommunip allaffianut pilanneqarnerata kinguninnguatigut piaarnerpaamik misissugassamik tunniussinissamut, suuneranik, ullormik sumilu pisarineqarsimaneranik paasissutissartalerlugu. Neqinik misissugassat poorineqartussamut plastikiusumut Pinngortitaleriffimmit tunniunneqarsimasumut aanaveersaammik imerpalasortalimmut ikineqartassapput.

*Imm. 2.* Kommuni allaffiata misissugassat paasissutissallu tiguneqareernerisa kinguninnguatigut Pinngortitaleriffik, Box 570, 3900 Nuummumt nassiutissavai.

### **Kapitali 9**

#### *Arfermik takornariartitsisarneq*

§ 32. Kommuni ileqqoreqqusaliorsinnaavoq arfanniernerup aamma arfermik takornariartitsisarnerup ingerlanneqartarneranut sukumiinerusumik maleruagassartalinnik.

### **Kapitali 10**

#### *Kommunit ileqqoreqqusaat*

§ 33. Kommunalbestyrelsi nunaqarfinni siulersuisunik aamma najukkani aalisartut piniartullu peqatigiiffiannik tusarniaaerluni kommunimi ileqqoreqqusakkoortumik piumasqaatinik aalajangersaasinnaavoq § 4, § 5, § 8, imm. 3 aamma 4, § 12, §§ 25-27 kiisalu § 32-imi aalajangersarneqarsimasunit sukannernerusunik.

*Imm. 2.* Kommunimi ileqqoreqqusat Piniarnermut Naalakkersuisumit atuutilersinneqassapput.

### **Kapitali 11**

#### *Immikkut akuersissuteqarneq*

§ 34. Ilisimatusarneq anguniagarineqarpat Piniarnermut Naalakkersuisoq nalunaarutip matuma aalajangersagartaanit immikkut ittumik akuersissuteqarsinnaavoq.

### **Kapitali 12**

#### *Nalunaaqutsersuineq, annissuineq aamma pineqaatissiisutit*

§ 35. Arfernik angisuunik uumatillugit misissugassanik tigusinerit, nalunaaqutsersuinerit kiisalu sulinerit allat misilittaantallit taamaallaat Pinngortitaleriffimmit suliarineqartarsinnaapput. Inuit allat Piniarnermut Naalakkersuisumut akuersissummik pissarsiniassapput.

§ 36. Uumasut nujuartat nungutaanissaminnik navianartorsiortinneqartut naasullu nunani tamalaani nioqqutigineqartarnerat pillugu isumaqatigiissut 3. marts 1973-imeersoq (Washingtonkonventionen/CITES) naapertorlugu arferit angisuut neqaannik, mattaannik il.il. iluanaarniutigalugu annissuinissaq eqqussuinissarlu inerteqqutaapput. Akuerisaavorli arferit angisuut § 34 naapertorlugu pisarineqarsimasut ilaannik annissuisinnaaneq.

§ 37. Pisanik arsaarinnittoqarsinnaavoq aamma akiliisitsoqarsinnaavoq:

1) Nalunaarummi ukunani §§ 2, 10, 11, 14, 15, 17, 18, 20, aamma 21, § 22, imm. 2, §§ 23, 26-31, 35, aamma 36, unioqqutitsisoqartillugu.

2) Akuersissummik utertissimangikkaanni tamanna pillugu peqqussut naapertorlugu § 7, imm. 2 aamma 4, aamma § 8, imm. 3 aamma 7, aamma

3) Ataatsimoorluni piniarnermut akuersissummik atuineq § 12 naapertorlugu aamma § 12, imm. 5.-imi piunasaqaataasunik naammassinnissimangikkaanni.

*Imm. 2.* Ingerlatseqatigiiffiit ilaallu ilanngullugit (inatsisitigut piginnaatitaasut pisussaataasullu) akiliisinniqarsinnaapput aamma pingitsaaliinikkut arsaarinnissuteqarfigineqarsinnaapput nalunaarummi matumani atuuttumi aamma Kalaallit Nunaanni pinerluttulerinermi inatsisimi kapitali 5 naapertorlugu malittarisassanik unioqqutitsisimagunik.

*Imm. 3.* Kalaallit Nunaanni pinerluttulerinermi inatsimmi malittarisassat malillugit nalunaarut naapertorlugu kommunimi ileqqoreqqusaliat atuuttut naapertorlugit pineqaatissiilluni akiliisitsisoqarsinnaavoq aamma arsaarinnissuteqartoqarsinnaavoq.

### Kapitali 13

#### Atuutilersitsineq

§ 38. Nalunaarut atuutilissaaq 1. januar 2015 aallarnerfigalugu.

*Imm. 2.* Arfernik angisuunik illersuineq piniarnerlu pillugit Namminersorlutik Oqartussat nalunaarutaat nr. 4, 7. februar 2013-imeersoq peqatigitillugu atorunnaarsinneqarpoq.


*Imm. 3.* Akuersissutinut allagartat akuersissutillu 2015-imut atuuttut nalunaarut manna naapertorlugu malittarisassaqaartinneqarput.

*Namminersorlutik Oqartussat, ulloq 22. december 2014*

  
Karl-Kristian Kruse

/

17

  
Jørgen Isak Olsen